

INUIT ATAQATIGIIT

INATSISARTUNI



3. august 2016

UKA 2016/137

Inatsisartut suleriaasiat § 33 immikkoortoq 1 naapertorlugu matumuuna inatsisartunut aalajangiiffigisassatut siunnersuut imaattoq saqqummiuppara.

**Kommunit kattunnerisa kingorna Naalakkersuisut malitseqartitsillutik
aaqqissuusseqqissinnaanissamut UKA2017-mut sinaakkutissanik
tunngavigisassanillu nassuaasioqqullugit Inatsisartut aalajangiiffissaattut
siunnersuut.**

(Inatsisartunut ilaasortaq Aqqaluaq B. Egede, Inuit Ataqatigiit)

Tunngavilersuut:

Inuit Ataqatigiit isumaqarpugut nunatsinni kommunit kattunnerisa kingorna aaqqissuuseqqinneq arlapassuartigut suli "nukittorsagassarpassuaqartoq". Nalunngilarput inoqarfipassuarni inuit atugaat pitsaanerusariaqartut. Inuit atugarissaarnermikkut naligiinnginnerat malunnaatilimmik qaffakkiartorpoq. Aningaasarsiaakkaat isertitakinnerillu aamma imminnut ungasilliartorput. Allatut oqaatigalugu immitsinnut ataasiakkaatut atukkatigut ilisarisinnaanerput ilungersunarsiartorpoq.

Kommunit aalajangeeqataalluinnartuupput inuit qanoq atugaqarnissatsinnut. Taamaammat aaqqissuuseqqinnerit annertuut kommuninut tunngassuteqartut aamma inuit tamarmik sunniuteqarfigisariaqarpaat, peqataaffigisariaqarpaat suleqatigiinneq tamatsinni nukittunerusoq pilersinneqartariaqarpoq. Aamma naalakkersuinikkut.

Inuit Ataqatigiit pingaartilluinnarparput kommunit innuttaasut ajornartorsiornerpaaartaannut isumaginninnissamut nukissaqarlutik ingerlariartitseqqinnissamut siuarsaasinnaasuullutik suleqateqallaqqissuunnissaat. Taamaammat isumaginninnikkut sullissiviit aamma sulisut piginnaanilissuit kommunini sipaarutaanatik inuit namminneq siuarsarniarnerannut ilapittuutaalluarnissaat pingaaruteqarpoq.

Iolloqarfiit nunaqarfiillu inuisa siuarsaaqataanissaminik kajumittut pisortat aningaasaliisarneranni missukutaajunnaarsinnerisigut sulinerat nukittorsarneqarsinnaasoq Inuit Ataqatigiit upperaarpot. Isumassarsatsialaasinnaavoq illoqarfiit nunaqarfiillu kommunit aningaasanik kaavliaartitaaniit immikkoortsiviusalerlutik qulakkeerunneqarnissaat. Siuarsajumasut suleqataajumasullu periarfissinneqartariaqarput, naluneqanngilarmi sipaarniarneq tamatigut aningaasarsiornerup iluaqtigisangnikkaa.

Kommunit aningaasaqarnikkut ajornartorsiortut innuttaminnik artukkinerpaasarpot, akitigut aamma atugassarititaasut allat eqqarsaatigalugit. Kommunit ilungersunartorsiortut ilisarnaatigisarpaat suliffissaaleqinerpaat isumaginninnikkullu suliassaqarfiunerpaaat aamma inuuniarfialugit akisunerpaat. Kommunit ingerlalluartut aningaasarsiorfiulluartuupput akinillu appasinnerpaanik akilersuiffiusarlutik.

Pissutsit taamak eqartigisumik aaqqissuussaanerat nutarternialik. Naleqqussaaniarta nammaqatigiinneq inuit atugaannik naligiissaarineq timitalersorlugu, aamma kommunit akornanni. Tamakkuali pitinnagit kommunit qassiussanersut, kommunit killeqarfii qanoq iluseqassanersut qulakteertariaqarpagut. Suut tunngavigalugit kommunit aggulunneqassappat? Allaffissornikkut aningaasarsiornikkullu piumasaqaatit siunertallu qanoq ittut tunngavagineqassappat? Allarpassuillu suliassat sularalugit aallartittoqartariaqarpoq. Kommunimmi inunnut tulluarsartariaqarput, killormuunngitsoq.

Inuit Ataqatigiit ammavugut partiit akornanni suleqatigiissitaliortoqassappat. Inatsisartut ataatsimiitaliaanni ataavartuni, imaluunniit ataatsimiitaliaagallartumik suleqatigiiffissatsinnik pilersitsisoqassappat suleqataanissatsinnik kajumeqaagut. Naalakkersuisooqatigiit apeqqutit taamaattut isummerfigisinnaappatiget isumaqarpugut nunatsinni kommunit kattunnerisa kingorna sularilluarnerusinnaasagut aallartilluarsinnaassagivut.

Neriulluta siunnersuut Inatsisartunit tamanit aamma naalakkersuisuniit ilalerneqarluni suleqataaffigineqarnissaminut tikilluaqquneqassasoq.

Pisortanut aningaasatigut allaffissornikkullu kingunerisassat:

Siunnersuutip sularineqarnera AC Fuldmægtigep ukiup ataatsip sivisussusilimmik naleqarnissaa naatsorsuutigineqarpoq 500.000 kruuninik nalilimmik.